

**13 AUGUST**  
**RUGACIUNEA 1**  
**SF. IERARH**  
**TIHON AL VORONEJULUI**

**МОЛИТВА**

О, великий святителю Христов и чудотворче Тихоне! Услыши нас, многогрешных, прибегающих к тебе с теплою верою и умиленною мольбою. Зане ве мы ангелоподобное благое житие твое на земли, прославляем ко всем твою милость, благоговеем пред выотою твоих христианских добродетелей, имиже во благовремени преуспевал еси к славе дивно прославившаго тя Господа. Ты воистинну был еси добрый пастырь словеснаго стада Христова, Таин Божиих доблественный строитель, столпе и украшение Церкви Православныя, Российский Златоусте, языческих обычаев крепкий искоренителю, преискусный истолкователю Евангельскаго учения, ревностный блюстителю священных отеческих преданий, любителю монашескаго безмолвия, богодухновенный собирателю сокровища духовныя мудрости от видимаго мира сего, премудро Богом

сотвореннаго. Ты, яко избранный сосуд благодати, неленостно поучал еси всех жаждавших спасения словом, житием, любовию, духом, верою, чистотою и смирением. Ты был еси милостивый защитник сирых, призрение вдовиц, убогих и всем сущим в бедах и напастех скорый утешитель. И ныне вемы, яко предстоиши пред лицом Господа славы и имаши велие к Нему дерзновение; сего ради к тебе, отче, прибегаем и усердно молим тя: буди о всех нас ходатай у Престола Всевышняго. Да простит Он беззакония и неправды наша; да просветит омраченный суетою ум наш и направит к истинному свету Богопознания; да сохранит слабыя сердца наша от любострастных любовных увлечений и тлетворнаго мудрования века сего; да подаст земли благовременное орошение дождей и плодоношение и вся нам полезная, яже к животу временному и вечному, да вси притекающие к тебе обретут мир, любовь и безмятежие. Церкви нашей испроси у Небеснаго Царя милость, благоденствие, спасение, на враги же победу и одоление. Отечество наше огради спокойствием и тишиною. Сохрани град сей от всяких соблазнов и научи всех нас благоговейно и Богобоязненно шествовати по стезям заповедей Божиих, да сподобимся и мы купно с тобою и со всеми святыми стати одесную Господа сил в день

страшного всемирного суда Его. Помяни, угодниче Христов, святителю отче Тихоне, во святых своих молитвах и души отшедших отец и братьев наших, да упокоит их Господь в Небесных селениях; не презри и наше воздыхание, да выну прославляем Отца и Сына и Святаго Духа, ныне и присно и во веки веков. Аминь.